

Sing vooraf: Psalm 73:1 (p. 366)

- 1 Voorwaar, God is vir Isr'el goed, / vir wie opreg is van gemoed.
Gods weg kan nooit so donker wees nie, / dat Hy nie sorg vir wie Hom vrees nie.
Maar ag, hoewel my siel dit weet, / tog het my voet haas in my leed
gewankel, en dit was vir my / so donker dat my voet wou gly.

Ons hulp is in die Naam van die Here wat die hemel en die aarde geskape het.
Geliefdes, genade en vrede vir u van God ons Vader en die Here Jesus Christus deur die kragtige
werking van God die Heilige Gees.

Amen.

Lofpsalm 146:1, 6 (p. 700)

- 1 Prys die HEER met blye galme, / o my siel, daar 's ryke stof!
'k Sal, solank ek leef, my psalme / vrolik toewy aan sy lof
en Hom, wat sy guns my bied, / altyd groot maak in my lied.
- 6 Dis die Heer se mededoë / wat die blinde oog verlig;
wie in stof lê neergeboë, / word deur Hom weer opgerig.
Hy bemin die wat opreg / wandel in sy woord en weg.

Gebed

- **Doksologie:**
- **Aanbidding:**
- **Skuldbelydenis:**
- **Vergifnis:**
- **Dank:**
- **Smeking vir die nood van die gemeente en voorbidding vir die kerk, owerhede en sondige wêreld, asook die beroep op die beloftes van God**
- **Algemene bede:**
- **Verligting van die Gees ter wille van die Woorddiens:**

Amen.

Psalm 97:7 (p. 485)

- 7 Gods vriend'like aangesig / straal vrolikheid en lig / deur duisternis en smarte / vir alle opregte harte.
Regverdiges, wees bly! / En sing 'n lied daarby!
Verheug u in die HEER! / Lofsing sy Naam tot eer, / Hy's hoog en heilig, Hy!

Skriflesing: 2 Tessalonisense 2 en 2 Korintiërs 11

Teks: 2 Tessalonisense 2:4; 2 Korintiërs 11:14

. . . die teëstander wat hom verhef bo al wat God genoem word of voorwerp van aanbidding is, sodat hy in die tempel van God as God sal sit en voorgee dat hy God is. (2 Tessalonisens 2:4 AFR1953)

En geen wonder nie! Want die Satan self verander hom in 'n engel van die lig. (2 Korintiërs 11:14 AFR1953)

Dis baie moeilik om die Satan te hanteer, want hy lieg nie net nie – hy het altyd 'n stukkie van die waarheid iewers beet.

- Met hierdie stukkie van die waarheid speel hy asof dit die hele en die enigste waarheid is.
- Dit is waarom dit somtyds so moeilik is om te kan onderskei wat die waarheid in sekere sake is.

Die Satan probeer met alles in sy mag om die leuen as die waarheid aan te bied sodat ons van God af moet wegbuig.

- Daarom moet ons op so 'n manier lewe dat ons voortdurend besin of die dinge wat ons doen, en die dinge wat die lewe aan ons bied, die eer van die ware God dien.
- Die Satan maak dit sy saak om op te let hoe gelowiges se verhouding met die Here is. Ons lees veral op twee plekke in die Bybel daarvan.
 - Die een keer is met die beproewinge oor Job.
 - Toe die engele in die hemel voor God staan om aan Hom verslag te doen, toe staan die duiwel ook daar.
 - Hy weet presies hoe goed die verhouding tussen God en Job is.
- Die ander keer – in Sagaria 3 – is toe die Satan in die hemel gestaan en die hoëpriester aangekla het.

Uit hierdie twee gedeeltes leer ons dat die Satan twee dinge doen:

- Die Satan luister na die engele se verslae om te kan weet wat besig is om te gebeur in God se raad.
- Verder is hy gou by die Here om gelowiges te gaan aankla wanneer hy op hulle sondes afkom.

U moet egter baie fyn oplet na sy werkmethode.

- Hy maak altyd gebruik van 'n swak aanbieding van die waarheid om die Here se betroubaarheid te skend.
- Die oomblik wanneer hy ons vertrou in die Here geknak kry, mislei hy ons om sondes te doen.
- Die Here skryf in 2 Korintiërs 11:3 dat die duiwel presies hierdie metode gebruik het om Eva te verlei, en dat hy vandag nog gelowiges op hierdie manier mislei.

Toe die Satan die mens verlei het om in sonde te val, was een van sy beweegredes dat hy die aanbidding wat die mens aan God gee, vir homself wou hê.

- Vandag is sy metode nog steeds dieselfde.
- Al hoe meer hy ons met sy gebuigde eerlikheid oorhaal om volgens sy standarde te lewe, al hoe meer neem hy God se posisie in ons lewe in.

Dis presies wat in 2 Tessalonisense 2:4 staan.

- Die duiwel wil in God se tempel sit en maak asof hy God is.
- Die wettelose mens wat vir die verderf bestem is, kruip in die kerk weg, leer die Bybel hier.

Die duiwel het nog steeds dieselfde swakhede as wat hy aan die begin gehad het:

- Hyself kan nie iets oorspronklik uitdink nie.
- Hy besit ook geen inisiatief nie.
- Hy gebruik altyd God se Woord, en hy kruip daaragter weg.
- Toe hy Jesus in die woestyn versoek het, het hy ook elke keer tekste uit die Bybel aangehaal.

Die Here Jesus het ook al voorspel dat die duiwel in die laaste dae met hierdie werkmethode vorendag sal kom.

- Die Here Jesus het gesê baie sal onder sy Naam kom en sê: Dit is Ek! (Lukas 21:8).

- Die mense sal vir hierdie valse predikers en hulle evangelies val, want die Here leer in Markus 13:21:

En as iemand dán vir julle sê: Kyk, hier is die Christus! of: Kyk, daar! — moet dit nie glo nie. (Markus 13:21 AFR1953)

Kyk, hier is die Christus! Of: Kyk, daar!

- Hierdie mense is almal voorlopers van die antichris.
- Die duiwel gaan dus in die kerk inkom en maak asof hy God is.

Dit skep 'n groot probleem, want die Satan se aanslag het twee eienskappe wat dit uiters moeilik maak om agter te kom wanneer dit hy is en wanneer dit God self is wat aan die woord en werk is:

- Die eerste is dat hy met gedeeltelike waarheid kom.
 - Hy verswyg soms iets,
 - ander kere verdraai of bevraagteken hy dinge,
 - maar sy vertrekpunt is altyd die waarheid self.
- Die tweede is dat die aanslag uit 'n rigting kom waarvandaan ons hom nie verwag nie – hy kom in die kerk asof hy God is.

Die ware gelowige sal egter die probleem kan uitsorteer, al is dit met baie moeite, want daar staan in 2 Tessalonisense 2:6 die woorde:

Julle weet wat hom teëhou.

- Julle weet!
- Dit gaan dus hier oor geloof, want 'n ware geloof is ook 'n gewisse kennis.

Hierdie kennis kan ons net op een plek kry, en dis uit die Bybel onder die leiding van God die Heilige Gees.

- Die Bybel is God se besondere openbaring.
- Die ware gelowige se onderskeidingsvermoë word dus in hierdie geweldige verskansde aanval van die duiwel geborg deur kennis wat God die Heilige Gees in hom werk.
- Deur die werking van die Heilige Gees in hom kan die ware gelowige dus deur die kamoeflering van die duiwel sien.

Die bewys vir hierdie stelling vind ons in Matteus 13:19:

As iemand die woord van die koninkryk hoor en nie verstaan nie, kom die Bose en roof wat in sy hart gesaai is — dit is hy by wie langs die pad gesaai is.

(Matteus 13:19 AFR1953)

- As jy nie kennis het nie en jy verstaan nie die ware evangelie nie, dan neem die duiwel die waarheid van jou af weg.
- 2 Korintiërs 4:3-4 sluit hierby aan.

Maar as ons evangelie dan nog bedek is, is dit bedek vir die wat verlore gaan, naamlik die ongelowiges in wie die god van hierdie wêreld die sinne verblind het, sodat die verligting van die evangelie van die heerlijkheid van Christus, wat die beeld van God is, op hulle nie sou skyn nie. (2 Korintiërs 4:3-4 AFR1953)

Die gedeelte wat ons gelees het – 2 Tessalonisense 2:12 – leer presies dieselfde ding:

- God stuur die krag van die dwaling om die wat die waarheid nie geglo het nie, te verlei.

- U moet besef hoe maklik en prakties die duiwel hierdie verleidingswerk van hom doen.

Kyk na 'n paar voorbeelde uit die Bybel

- Hy hits Dawid aan om die volk te tel – teen God se bevel in. Dit gebeur en straf volg! (1 Kronieke 21:1)
- Ons lees in 1 Tessalonisense 3:5 dat Paulus navraag doen of die versoeker (Satan) die gemeente van Tessalonika nie al versoek het, en hulle prediking tot niet gemaak het nie.
- Die duiwel werk dus onder sekere omstandighede met 'n hele gemeente!
- Die duiwel versoek ook ons gebrek aan selfbeheersing! (1 Korintiërs 7:5).

Wat die Satan se aanslag nog moeiliker maak, is die feit dat hy dit in die laaste dae sal doen met wonders en tekens. Dis die dinge waarmee u gekonfronteer gaan word.

- In die gedeelte wat ons gelees het, staan geskryf dat die Satan homself in die kerk openbaar met allerhande kragtige dade en tekens en wonders.
- Hy gaan dus probeer lyk soos die Here self, want wie anders sal in die kerk die soort van dinge doen?

Dit gaan baie moeilik wees om hierdie dinge uitmekaar te rafel as dit op stuk van sake kom.

- Die saak word nog moeiliker, want die Satan werk ook nog deur mense.
- Hy het 'n volledige stel profete in die kerk.
 - Ons lees van hulle deur die hele Bybel.
 - Hulle is daar van die vroegste jare af, en hulle sal daar wees tot wanneer die Here op die wolke kom.

Wat nou? Die Here gee aan u die volgende troos:

- Die Here Jesus het die Satan met sy kennis van die Bybel verslaan toe die duiwel Hom versoek het.
- Die Here Jesus het die duiwel elke keer daarop gewys dat dit nie al is wat daar in die Bybel staan nie. Daar staan meer dinge geskryf, en mens moet alles saam lees.

U het mos die Bybel. En u het ook mos die Heilige Gees wat u lei. U het al die middele wat God gee.

- Wat meer is, is die feit dat die Here Jesus Christus al klaar die duiwel se mag gebreek het.
- Met elke optrede van die Here Jesus is die duiwel tree vir tree verslaan, totdat Jesus selfs met majesteit uit die graf opgestaan het om sy heerskappy oor die Satan te bevestig.

Die Here bevestig dit met elke preek weer aan ons.

- Hy verseker ons ook nou weer daarvan dat ons as gelowiges teen die duiwel staande bly in die krag wat Hy verwerf het.
- Die Heilige Gees leer dat God reeds die oorwinning aan ons gegee het.
- Ons moet dit net met verantwoordelikheid besef, aanvaar en benut.

Al gooi die Satan ook 'n derde van die sterre op die aarde, soos wat dit beskryf word in Openbaring 12:4, dan nog oorwin die Here Jesus hom en al sy engele (Openbaring 12:9).

- Daarom lees ons in Lukas 10:18 dat die Satan soos 'n weerligstraal uit die hemel geval het.
- Die Here openbaar selfs aan ons waarom dit so is: hulle het geveg en die duiwel se engele is deur Michael, die aartsengel, uit die hemel uitgedryf – so finaal dat daar nooit weer vir hulle plek in die hemel is nie.

- Die duiwel is deur die Here Jesus self verslaan. Dis waarom hy soos 'n weerligstraal uit die hemel uitgeval het, en hy self ook nou nie meer toegang tot die hemel het nie.

Luister nou na die troos.

- Al kom die Satan self in die kerk in en maak asof hy God self is – hy kom as 'n verloorder hier aan.
- Hy is nie God nie, en hy het teen God verloor.
- Die tyd is al amper hier dat God hom finaal gaan vernietig.

Dis asof die Here die Satan nou maar in dieselfde kategorie as 'n wilde dier tel, want daar staan in 1 Petrus 5:8 dat die Satan nou soos 'n brullende leeu rondgaan om alles te verskeur wat in sy pad kom.

- Hy het die mag om te verwoes, maar selfs daarin is hy heeltemal ingeperk.
- 'n Deel van sy verwoestingswerk is dat hy voorgee dat hy 'n engel van die lig is, om daarmee mense te probeer verlei.

U sal hom elke keer uitken – miskien nie altyd maklik nie – maar as u God en sy Woord ken, sal u die duiwel ook uitken.

- 'n Deel van die Here Jesus se genade is dat die Heilige Gees u nooit verlaat nie.
- Hy bly by u met insig en onderskeidingsvermoë – God laat sy kinders nooit in die steek nie.

Maar nou moet u ook luister na die oordeel in hierdie saak. Die Bybel leer dat daar halfhartige gelowiges is.

- Vanselfsprekend is hulle agterlosig met hulle geloofslewe.
- Daarom staan daar in die Bybel dat die Satan die ware evangelie by hierdie mense kom steel, en dit met 'n valse een vervang (Matteus 13:19, 39).

Hier staan in die Bybel dat die Tessalonisensers mos weet wat dit is wat die duiwel nog terughou. Ons het gehoor wie dit is wat die antichris terughou en waarom.

- Die Here Jesus Christus en God die Heilige Gees hou hom terug totdat die verkondiging van die Woord sy volle loop oor die aarde geneem het.
- Die Here Jesus Christus hou die koms van die antichris terug totdat die kruisdood en die opstanding van die Here sy volle effek het onder die uitverkorenes in hierdie wêreld.

Vers 11 en 12 stel nog 'n saak duidelik – 'n baie minder aangename saak:

- Die antichris word deur die Here in sy diens gebruik.
- Die antichris is wel teen die Here, maar daarmee dien hy die Here daarin dat hy al diegene wat nie in die kerk hoort nie, agter hom aan uit die kerk uit weg verlei.
- Hy volvoer dus 'n suiwerende funksie in die kerk.

Dit kan nooit oor die gelowiges kom om verlei te word nie.

- Die Here openbaar duidelik in vers 13 dat Hy ons uitverkies het om van die eerstes te wees wat gered word.
- Ons wat in die laaste tye van die bestaan van die wêreld lewe, moet weet dat ons deeglik sal moet besin oor ons geloof in die Here Jesus Christus as die ewige God en Verlosser.

Die aanspraak van hierdie gedeelte is dus dat ons God voluit moet aanbid.

Ons moet ons kennis uit sy Woord vermeerder.

Ons moet so leef dat ons altyd toets en besin.

Ons moet seker maak dat ons die Satan se voorkoms betyds onderskei en ons lewe dan tot eer van die ware God reg leef.

Amen

Slotgebed

Psalm 4:3 (p. 15)

- 3 Wil jul aan Hom 'n offer gewe? / Die offer wat die HEER aanskou,
is in opregtheid reg te lewe, / en Hom alleenlik aan te klewe, / op Hom alleen jul hoop te bou.
Hoe baie vra terneergeboë: / Waar vind ons ooit die ware goed?
Verhef oor ons u Vaderoë, / sien op ons neer in mededoë, / verlig ons hart en ons gemoed!

Die genade van die Here Jesus Christus en die liefde van God en die gemeenskap van die Heilige Gees bly by u almal.

Amen.

Dr MJ du Plessis
Gereformeerde Kerk Bellville
Datum: 28 September 2008